

■ PLED PER LA DUMENGIA

Dieu sin il culm

DA GISULA TSCHARNER, VEULDEN

Igl è avust, stagiun auta dals alpinists, insumma il temp dad ir per las muntognas enturn. Quai hai jau er fatg ier e stersas, sun ida persula tras il desert mirveglius tranter la zona da las alps e la zona da la naiv. Sun vagabundada sur spundas e bots, sper la gripa en tut sias colurs, hai guardà ditg las auas tranter boas frestgas. Mes senns eran tut concentrads al preschent, ni tschiel, ni culms, ni glied vesev jau. Perquai era l'ora grisch-bletscha gist ideala.

Aquels che ma dumandavan avant tge ch'jau fatschia si là,

schev jau: «Meditar, far uraziun, entupar Dieu». Ils visavis guardavan in pau da curius ... Uschia guard'ins er sin glied che sa tegn davent da servetsch divins, da baselgias insumma cun il motiv: «Jau chatt Dieu bler meglier en la natira che durant in priedi u ina messa. La natira cuntegn per mai tut la cardientscha.» Preditgantas e spirituals dad omaduas confessiun audan quai savens, vegnan magari in pau tristas (u scuidus?) e sa lamentan vinavant la nuncardientscha dad ozendi.

Sun jau nuncartenta u nuncristifidaivla, sche la natira ma

maina insaco datier al misteri divin, pia a Dieu? En nossa Bibla vegn raquintà da massa carstgauns che gievan adina apostas sin in culm, e quai durant plirs dis, per retschaiver meglier ils messadis impurtants da Dieu: Moses sin il Sinai, Elias sin il Horeb, Jesus en il desert. Er dunnas: Deborah fascheva cura d'olma sin il culm, la figlia da Jeftah prendeva cumia da la vita en ils culms.

En mia uffanza, sin las turas adina, ch'jau ma senti pli datiers al Nossegner sin il piz dal culm. Il bab na m'ha mai ris ora. En mes 54 onns n'hai jau betg pers

lezza relaziun profunda cun mes origin divin. Quel è mes bigliac, mia pusa, mia scolasta, mes nutriment, mes confiart, mia energia positiva. Dormind en il sac da bivac sut in grond crap u in pin spess, pia sin la buna mamma terra, na ma strucla gnanc ina nauscha conscienza; Dieu ans è bab e mamma ed anc bler auter. Ed al Jacob putgont che durmeva ordadora sin in crap, veva Dieu schizunt regalà in bel siemi, quel da la stgala cun anghels sisur. Er a tut quellas e quels che pelegrineschan ad in dals fieus alpins questa fin d'emna attest jau in porziun cardientscha elementara.